

魏叔子文集

○○明監軍副使黃公墓誌銘

公諱蓋卿字翊明晚更號務白世爲清江人生而軒
舉開美與熊文毅公化同學相得歡故文毅以女字
其子履中萬歷壬子舉於鄉屢試禮部不第嘆曰母
老矣欲丐微祿養吾親乃謁選得龍泉縣學教諭所
獎拔多一時聞人郭公維經歐陽公鉉並成名進士
卒死國難其尤著也崇禎戊辰改授衢州府推官衢
衝繁而俗險詖吏因緣爲奸公釐剔宿弊殆盡上官
以爲能使數署府縣官印旣擢知宿州以將母弗起

閉門謝賓客日過從惟文毅公及楊文正公廷麟曾
文忠公櫻而已文毅公仲子兆行負才節好度外士
嘗飲肆中見一偉丈夫與人語國變事慷慨髮上指
兆行心異就之談詢其姓氏則亾將蜀人周文彬也
公聞之延爲上賓時楊文正倡義督師贛州兆行從
文毅間關閩海而公誓死破產募兵於閩皂山之麓
圖大舉南應文正會有告密者敵帥以突騎數千襲
公諸募人皆烏合不戰而潰公僅身免文正公特疏
題授監軍副使未幾閩中潰贛州城破文正公自到

而文毅公亦以己丑歲自經於家公撫膺大慟曰熊
公得死所矣吾老無能爲乃遣履中艱難入粵命之
曰汝修力從王母反顧以終汝父之志吾死且無憾
旣履中授兵部主事粵西適潰竄身蠻獠中十餘年
弗得歸公長子剛中嘔血死公鬱鬱不得志遂嬰疾
不食及履中歸而公已死九年矣公卒壬辰十二月
距其生萬歷甲戌五月年七十有九禧旣按履中所
請兆行爲狀誌公作而歎曰嗚呼何其盛哉三百年
養士之報臨江爲烈與宋末之吉安等予生晚不獲

從公游而嘗師事文正公與兆行爲兄弟交聞公之
義而慕公也久矣公父我山公諱庸以公貴贈官妣
楊氏封孺人我山公好行其德萬歷戊子歲饑盡出
倉粟以貸貧者明年又饑則盡捐所負舉責者貧焚
其券方公兵潰時帥怒不得公縱火焚其屋三舉句
火皆滅人以爲我山公陰德公忠義之報云公初娶
關氏繼娶劉氏陳氏子二長剛中縣學生關出次履
中以縣學生授兵部車駕司主事劉出孫二楷府學
生楫縣學生履中出某年月履中奉公柩葬某鄉銘

曰人之爲物百二十唯孝與忠永不絕死生楊熊齊
芳烈馬鬣之封高揭揭垂於後裔待時發

熊見可曰連帶錯綜處法嚴而筆矯是深於左氏
者



Vertical columns of faint, illegible text, likely bleed-through from the reverse side of the page.

Vertical columns of faint, illegible text, likely bleed-through from the reverse side of the page.

Vertical columns of faint, illegible text, likely bleed-through from the reverse side of the page.

○○閨母丁孺人墓表

蓋聞婦人之德非必以奇節而後賢所遭出于天幸

尋常閨門之內蘋蘩^伏之供乾餼^伏之事達達爲人所不

可及而必以幽貞柔順爲之本故詩曰窈窕淑女君

子好逑是也克供乎內職屏以外無預事焉故詩曰

誰其尸之有齊季女又曰無非無儀嗟酒食是議是

也若此者必能順其夫之父母而致淡愛于其夫終

身無諍語之及故詩曰琴瑟在御莫不靜好若此者

其生也可稱其沒也可表淮安閭君再彭修齡之妻

姓丁氏祖文恪公諱士美嘉靖己未狀元官吏部侍

郎贈禮部尙書父中憲大夫知姚安府諱有殷崇禎

甲戌孺人年十七歸再彭再彭早失母夫人時參議

公老在堂孺人內外家皆貴盛特柔謹孝事參議公

自奉養朝夕至視疾喪葬無違禮遇二女公女妹必

敬以和身撫杜氏孤女甥而厚庀奩具嫁之生平于

奴婢罕叱咤聲接內外姻婭無失色孺人諱仙窈字

少姜行季性婉慧眉目朗秀知書明大體兼通琴弈

琴不由師授以意成譜妙合音節事再彭恭奉再彭

賓客酒漿久必飭夫婦相歡得白首如年少人甲寅

八月孺人以微疾卒再彭爲之不食者踰日期年不

飲酒食肉哀踰禮閻氏故世家自高曾以下生忌日

皆祭每歲十餘舉再彭好讀書交游四方士孺人直

日必夙興潔觴豆肴蒸僮被立須再彭拜獻未卒前

十日一祭愆期日亭午孺人覺之恚曰吾爲閻氏婦

奉蒸嘗四十年未嘗敢失事何今日而遽忌之豈死

期至神不守耶卒成禮又七日曾祖妣忌力疾整衣

肅拜如平時又三日而孺人歿焉孺人一子若璩諸

生名于時女六孫三人詒樸諸生次訓慤議畧孫女
五人嗚呼國不幸而有忠臣家不幸而有烈女節婦
世當承平家無有不祥則閨門之內其以奇節見者
不一二數故論婦德者必以庸行爲先也孺人于家
無專制鉅細必稟再彭然遇事達達開陳義命再彭
性褊每改容從之而孺人退益恂恂若不自勝者甲
申後孺人勸再彭應棄科舉學再彭遂以詩名平生慎
檢持畏物議不欲使有一言之過聞于人以自黜假
使孺人遭逢萬有一不幸其不敢私愛其身墮其名

節也。審矣。再彭哀過其喪。有以夫子與再彭若璩皆
有交。于是孺人葬四年矣。乃請予爲文表其墓。門墓
在吉家墩。距參議公兆西二百步。初再彭偕孺人上
先塋。憇此偶。指一穴曰。他日與汝合葬。是今正其處
始。天定云。

吳崧三曰。全以議論波瀾爲文。而鍼線細密。使人
不覺此行文之妙。變化於法者也。

迨旦庵曰。敘次懿行。全以零碎錯落出之。文便有
窈窕靜好之氣。



○○常熟顧耕石先生墓誌銘

君姓顧氏諱柔謙字剛中居蘇州之嘗熟縣父府學生諱龍章取浙江龍泉令華公女祖奉訓大夫廣東提舉司使諱文耀取知贛州府張公女誥封宜人文學君性嚴羣季皆庶孽少年狂易諸小人蠱以爲非每見文學君輒恐懼汗下及文學君生君而大夫捐館舍未幾文學君亦卒家難蠶起先世所遺資產園林書畫好玩具以至祠墓之木皆盡君家對宛山幼嘗同兄出門游有數人擁之行行乃擠墮大澤中母

夫人忽心動急呼老僕往跡之得俱不死自是不敢
更出遂得心悸疾年二十爲館甥于湖東譚氏補弟
子員督學倪公元珙宗公敦一御史祁公彪佳皆器
識君君自傷貧依倚外家不得奉母晨昏鬱鬱疾作
歲中頻往還昆承諸湖風發舟且覆君長身多力自
躍入水與舟子舁舟行疾遂大作君外父乃爲別置
宅使君迎母以來君病于是良已及母喪一號嘔血
數升勺水不入口者三日逾二年值甲申之變君哀
憤往往形詩歌有殺賊有心爲厲鬼報君無路恨蒼

天之句讀者悲之君不妄交游以父執事馬文忠公
世奇師事舅氏華鳳超先生允誠而江陰黃介子先
生毓祺嘉定黃蘊生先生淳耀皆一見定交同邑徐
瞻淇先生澳於君尤篤諸君子先後死國難君皆設
位而祭爲詩文弔之哭盡哀君二子長祖禹次安世
安世先君卒祖禹時亦棄舉子業日侍君臥起見君
常閉門嘿坐或竟日不食祖禹叩頭寬譬君乃曰汝
能終身窮餓不思富貴乎祖禹應曰能汝能以身爲
人枕上肉不思報復乎祖禹應曰能君乃大喜曰吾

與汝偕隱耳。遂自名曰隱。字曰耕石。署其室曰伐檀。
常中夜蹴祖禹起曰：汝他日得志如舊怨何？祖禹曰：
每憶幼時，祖母抱見，置膝上，爲言家難及墮大澤中，
事祖禹一飯不敢忘矣。君曰：嘻，何所見之小也？夫天
道春舒而秋肅，吾家數傳以來，頗稱盈盛，以汝祖之
才而竟中折天也。于狂且何尤？且彼敗我家者，曾有
勝于我乎？吾力能賑之，猶當衣食而覆被之，慎毋以
前事爲念也。且夫同室之中，寧彼以非禮來，吾不可
以非禮報。往者吾外祖，不能平一言于宮，逮其黨薄